

- प्रधानमंत्री नरेन्द्र मोदी 14 साल ताई उम्र री टाबरियां मांय सर्वाइकल कैंसर री रोकथाम सारु अजमेर ऊं देशभर मांय एचपीवी टीका लगावण रा कार्यक्रम री सरुआत कीनी- कह्यो -अभियान देश री महिलावां ने मजबूत बणावण री दिशा मांय खास जतन।
- आतूणी एशिया मांय हिफाजत रा मुश्किल हालात ने ध्यान राखता थकां हवाई कम्पनियां एयर इंडिया अर इंडिगो वठे सारु सगळी उड़ानां टाळी।
- कोटा रा मुकुंदरा हिल्स टाइगर रिजर्व मांय आज मध्यप्रदेश रा बांधवगढ़ ऊं एक बाघिन लायी ज्यी-टाइगर रिजर्व मांय बाघां री तादाद बध र सात व्ही।
- प्रदेश मांय घणखर ठौड़ां दिन अर रात री बगत पारो तापमान सामान्य ऊं दो ऊं छः डिग्री सेल्सियस ताई ऊंचो दर्ज करी ज्यो।

000

प्रधानमंत्री नरेन्द्र मोदी आज अजमेर ऊं प्रदेश सारु विकास री 43 परियोजनावां जनता ने सूंपी अर नुवा कामां री नींव रखी। आं मांय पीवण अर पाणत रा पाणी, बिजली, अक्षय ऊर्जा अर सड़क परियाजनावां समेत बांदीकुई-जयपुर 4-लेन ग्रीनफील्ड एक्सप्रेस-वे समेत केई खास परियोजनावां शामिल है। ई रे अलावा जयपुर रा सांगानेर हलका अर जोधपुर शहर मांय खंभां माथे बणायी जावण वाळी सड़क रा काम अर सगळां सारु पीवण रो साफ पाणी मुहैया करावणो तैय करण सारु नोनेरा पेयजल परियोजना रा चार पैकेज अर परवन-अकावद वृहद पेयजल परियोजना रा पांच पैकेज रा काम री नींव रखी। ई मौके श्री मोदी कह्यो के विकास परियोजनावां ऊं जनता रो सुबीतो बधेला अर मोट्यारां सारु नौकरी अर काम-धंधा रा नुवा मौका बणेला।

000

इण ऊं पैली प्रधानमंत्री अजमेर ऊं ई देशभर मांय 14 साल उम्र ताई री टाबरियां ने ह्यूमन पैपिलोमा वायरस-एच.पी.वी. ऊं बचावण सारु टीका लगावण रा कार्यक्रम री ई सरुआत कीनी। प्रधानमंत्री री मौजूदगी मांय पांच टाबरियां रे एचपीवी ऊं बचाव रा टीका लगायी ज्यो। ई पाछे श्री मोदी टाबरियां सागे बातचीत ई कीनी। प्रधानमंत्री कह्यो के भाजपा सरकार हमेशा महिलावां री छोटी ऊं छोटी समस्यावां आगी करण माथे खास ध्यान दीनो है। वे कह्यो के एचपीवी टीका लगावण रो अभियान ई दिशा मांय खास जतन है।

000

ई मौके प्रधानमंत्री राज्य सरकार रा न्यारा-न्यारा महकमां मांय नौकरी लागण वाळा 21 हजार 800 ऊं बत्ता नौजवानां ने नौकरी लागण रा कागज दीना। कायड़ विश्राम स्थली माथे व्ही जनसभा मांय श्री मोदी राज्य री मौजूदा सरकार रा दो साल रा कामकाज माथे संतोष जतायो। श्री मोदी भरोसो जतायो के केन्द्र अर राज्य सरकार मिल र विकास रा नुवा गेला माथे जनता री सेवा मांय और तेजी सागे कर्तव्य पूरो करेला। प्रधानमंत्री हाल ही मांय व्ह्या वां रा इस्राइल दौरा रे दौरान हाइफा री लडाई मांय प्रदेश रा रण बांकुरा दलपत सिंह रा योगदान ने याद करता थकां इण ने आखा देश सारु माथो ऊंचो करण वाळो बतायो।

प्रधानमंत्री लारला दिनां नई दिल्ली मांय व्ही इंडिया एआई इम्पैक्ट समिट ने देश सारु गर्व रो विषय बतायो जदके वठे कांग्रेस रा कार्यकर्तावां कानी ऊं करी ज्यो भद्दा प्रदर्शन री आलोचना कीनी। जळसा मांय मुख्यमंत्री भजनलाल शर्मा वां रा राज रा दो साल रा कामकाज री उपलब्धियां री जाणकारी दीनी।

000

पश्चिम एशिया मांय हिफाजत ऊं जुड़्या हालात ने ध्यान राखता थकां एयर इंडिया अर इंडिगो कंपनियां वां हलका रा देशां मांय आवण-जावण वाळी सगळी उड़ानां टाळ दीनी है। एयर इंडिया रे मुजब वा सुरक्षा हालात माथे लगातार निजर राख रही है अर हालात सामान्य व्हेवण पाछे ई उड़ानां पाछी सरु करी जावेला। हवाई कंपनी इंडिगो ई आज आधी रात ताई ई हलका मांय आवण-जावण वाळी सगळी उड़ानां रद्द कर दीनी है। दोन्यू हवाई कंपनियां मुसाफिरां ने हर संभव मदद देवण रो भरोसो दिरायो है।

000

आज राष्ट्रीय विज्ञान दिवस मणायी ज्यो। महान भौतिक विज्ञानी सर सी.वी. रमन कानी ऊं 'रमन प्रभाव' री खोज री याद मांय हर साल ओ दिन मनायो जावे है। ई मौके प्रदेश मांय "विज्ञान में महिलाएं: विकसित भारत की उत्प्रेरक" मुद्दा माथे न्यारा-न्यारा कार्यक्रम राख्यी ज्यो। जयपुर मांय तीन दिन ऊं चाल रह्यो राजस्थान विज्ञान महोत्सव आज पूरो व्हे ग्यो। महोत्सव मांय विद्यार्थियां अर जनता मांय विज्ञान रा प्रति रूझान बधावण अर नवाचार ने बधावो देवण सारु केई कार्यक्रम राख्यी ज्यो। सवाईमाधोपुर रा एक गैर-सरकारी कॉलेज मांय चित्रकला अर कविता होड़ राख्यी ज्यी।

000

मध्यप्रदेश रा बांधवगढ़ ऊं एक बाघिन कोटा रा मुकुंदरा हिल्स टाइगर रिजर्व मांय लायी ज्यी है। साढ़े तीन साल री ई बाघिन ने जामरा घाटी रा एंक्लोजर मांय छोड़ी ज्यी है, जठे वां रा स्वास्थ्य माथे निजर राख्यी जा रही है। आं बाघिन आयां पाछे मुकुंदरा हिल्स टाइगर रिजर्व मांय बाघां री तादाद सात व्हे ग्यी है। इण ऊं पैली पेंच टाइगर रिजर्व ऊं ई एक बाघिन मुकुंदरा हिल्स टाइगर रिजर्व मांय लायी ज्यी ही, जिण ने स्वास्थ्य जांच अर निगराणी री मियाद पूरी व्हेवण पाछे जंगल मांय खुली छोड़ दी जावेला। दूजी कानी अफ्रीकी देश बोत्सवाना ऊं लायी ज्यो नौ चीतां ने आज मध्यप्रदेश रा कूनो नेशनल पार्क मांय छोड़ी ज्यो। केंद्रीय पर्यावरण मंत्री भूपेंद्र यादव छह मादा अर तीन नर चीतां ने क्वारंटीन बाड़ा मांय छोड़्या। अ चीता भारतीय वायु सेना रा खास जहाज ऊं बोत्सवाना ऊं ग्वालियर लायी ज्यो, जठे ऊं वां ने हेलीकॉप्टर रे जरिए कूनो पूगायी ज्यो। ई पाछे भारत मांय चीतां री तादाद 39 व्हे ग्यी है, ज्यां मांय भारत मांय जन्म्या 28 शावक ई शामिल है। श्री यादव 'प्रोजेक्ट चीता' ने चीता बचावण ओड़ी मोटी उपलब्धि बतायो।

000

राज्य सरकार कानी ऊं प्रदेश री तीन ठौड़ां माउंट आबू, जहाजपुर अर कामां रा नाम बदलण रा ऐलाण पाछे न्यारा-न्यारा संगठनां अर जनता रा नुमाइंदां री ओर ऊं खुशी जाहिर करी जा रही है। माउंट आबू ने आबूराज रा नाम ऊं नुवी पिछाण मिलण परां हलका रा लोग मिठाई खिला र अर आतिशबाजी कर र खुशी जतायी। भीलवाड़ा जिला रा जहाजपुर रो नाम यज्ञपुर करण परां जनता मुख्यमंत्री रो आभार जतायो। विधायक गोपीचंद मीणा बतायो के कस्बा रो नाम बदली करण सारु लारला दिनां नगरपालिका बोर्ड री मीटिंग मांय प्रस्ताव पास कर र राज्य सरकार ने भिजवायी ज्यो हो।

0000

प्रदेश मांय लारला चौबीस घंटा मांय मौसम साफ रह्यो। बाड़मेर मांय सब ऊं बत्तो 35 दशमलव 2 डिग्री सेल्सियस तापमान दर्ज करी ज्यो, जदके अलवर मांय कम-ती-कम तापमान दस डिग्री सेल्सियस नापी ज्यो। मौसम केंद्र जयपुर रे मुजब आज राज्य रा ऊगणी हलकां मांय हल्का बादळा व्हेवण रा आसार है। महकमो 4 मार्च री रात ऊं प्रदेश रा उतराद-ऊगणी हलकां मांय मौसम मांय बदलाव री संभावना जतायी है।

000

हनुमानगढ़ ज़िला मांय संगरिया रा कृषि विज्ञान केंद्र मांय आज किन्नू महोत्सव राख्यी ज्यो । हनुमानगढ़ जिला परिषद रा सीईओ ओमप्रकाश विश्नोई बतायो के राज्य सरकार रा 'पंच गौरव' कार्यक्रम रा तैत राख्यी ज्या ई महोत्सव मांय हनुमानगढ़ अर आरे-सारे रा हलकां रा करीब साढे पांच सौ किसान, कृषि वैज्ञानिक, प्रगतिशील बागवान अर कारोबारी शिरकत कीनी ।

000

रेलवे री जनरल टिकट बुक करावण री यूटीएस मोबाइल ऐप काल ऊं नी चालेला । यू.टी. एस. माथे मिलण वाळा सुबीता अब नुवा रेल वन ऐप माथे मिलेला अर आर-वॉलेट री रकम आप ऊं आप ई ई ऐप मांय जमा व्हे जावेला ।

000